

81. ALDIZKARIA - 2003ko ekainaren 30a

• III. NAFARROAKO TOKI ADMINISTRAZIOA

○ ETXAURI

Ordenantza behin betikoz onetsirik

Udal honek, 2003ko maiatzaren 2an egin bilkuran, honako erabaki hau hartu zuen:

"Jendaurrean egoteko epea iragan da inork alegaziorik aurkeztu gabe Ezkondu Gabeko Bikote Egonkorren Etxauriko Udalaren Erregistroaren Antolaketa eta Funtzionamendua arautzen dituen ordenantza hasiera batean onesteko erabakiaren kontra, 2003ko 10. Nafarroako ALDIZKARI OFIZIALEAN argitaratu baitzen, urtarrilaren 22an. Beraz, Udalbatzak, osoko bilkuran batzartuta eta boz batez, legeak eskatzen duen gehiengoa baita,

Erabaki du:

1. Ezkondu Gabeko Bikote Egonkorren Etxauriko Udalaren Erregistroaren Antolaketa eta Funtzionamendua arautzen dituen ordenantza hasiera batean onestea.
2. Ordenantzaren testu osoa Nafarroako ALDIZKARI OFIZIALEAN argitaratzea".

Etxaurin, bi mila eta hiruko maiatzaren hemeretzian. Alkatea, Alexander Irujo Labiano.

EZKONDU GABEKO BIKOTE EGONKORREN ETXAURIKO UDALAREN ERREGISTROAREN ANTOLAKETA ETA FUNTZIONAMENDUA ARAUTZEN DITUEN ORDENANTZA

1. artikulua. Ezkondu gabeko bikote egonkorren Etxauriko Udalaren erregistroak administrazio izaera du eta bertan ezkontzaz kanpoko bizikidetasunezko elkartzeak, baita haien iraungitzea ere, inskribatzen ahal dira ordenantza honetan ezartzen den eran eta baldintzetan.

2. art. Bikote guztiek, sexu berekoak izan edo ez, erregistroan inskribatzeko eska dezakete, baldin eta haien adostasun libre eta osoarekin ezkontzaz kanpoko bizikidetasunezko elkartzea osatu badute.

Gutienez, elkartutako kide batek egon beharko du Etxauriko Udalean erroldaturik, bertan bizi ohi delako.

3. art. Bikote bakoitzaren lehenbiziko inskripzioa egiteko, bi lagunek batera agertu beharko dute erregistroaz arduratzen den funtzionarioaren aitzinera, haien artean ezkontzaz kanpoko bizikidetasunezko elkartzea osatzen dutela deklaratzeko.

Ez da inskripziorik eginen bikoteko bat burujabetu gabeko adingabea bada, edo lerro zuzenean odolkidetasunezko edo adopzio bidezko ahaide badira, nahiz alboko lerrotik bigarren maila bitarteko odolkidetasunezko ahaide badira.

Bikoteko batek akats edo anomalia psikikorik badu, orduan ere ez da inskripziorik eginen.

Halakoetan, medikuaren irizpena beharko du, ezkontzaz kanpoko bizikidetasunezko elkartzea osatzeko gaitasuna aitortzen diona.

Era berean, inskripzioa ukatuko da bikoteko bat ezkondua baldin bada edo ezkontzeko gaitasun gabea deklaratu bada.

4. art. Lehenbiziko idazpena egitean, bikoteak nahi dituen argitasun guztiak agertarazi ahalko ditu beren arteko elkarteari buruz.

Hitzez hitz idazten ahalko dira elkartutako kideen giza eta ondare harremanak arautzen dituzten hitzarmenak.

Aitzineko lerroaldean aipatutako edukiak geroago ere inskribatzen ahalko dira, bikoteko bi kideak bertara joanda.

Nolanahi ere, elkartzea bukatu edo iraungitzeko oharpenak egiteko, aski izanen da kide bakar batek hala eskatzea.

5. art. Erregistroa Udalaren idazkaritza orokorrean egonen da.

6. art. Aurreko artikuluetan aipatzen diren inskripzioak erregistratzeko, Liburu Orokorra erabiliko da.

Liburua orri mugigarri, zenbatu eta zigilatuez osatua egonen da, eta irekitzeko eta ixteko eginbideak paratuko dira hasieran eta bukaeran.

7. art. Bikote bakoitzaren lehenbiziko inskripzioak oinarrizko inskripzioaren izaera izanen du eta horren bazterrean geroago Liburu Orokorrean elkarteari buruz egiten den bertze edozein idazpen agertaraziko da.

8. art. Erregistroak Liburu Lagungarri bat ere izanen du, inskribatuen deituren arabera ordenaturik, eta bertan adieraziko da Liburu Orokorreko zein orrialdetan dauden inskribaturiko bikoteekin zerikusia duten oharpenak.

9. art. Erregistroan inskribatutakoen intimitatea, norbanakoarena nahiz familiarena, babesteko, ez zaio publizitaterik emanen idazpenen edukiari, salbu eta erregistroaren ardura duen funtzionarioak luzatzen dituen egiaztagiriak, bikoteko edozein kidek, epaileek edo auzitegiek hala eskatu ondotik.

10. art. Egiten diren inskripzioak eta luzatzen diren ziurtagiriak doakoak izanen dira.

11. art. Izatezko bikoteen erregistroan inskribatzen diren ezkondu gabeko bizikidetasunezko elkartzeek ezkontza bidezko elkartzeen tratamendu bera izanen dute Etxauriko Udalean.

XEDAPEN GEHIGARRI BAKARRA

Ordenantza hau berrikusiko da, legeetan aldaketarik bada gai honen inguruan.

I. ERANSKINA

Bikote egonkorren udal erregistroa

Etxauriko Udalean, halako egunean: (urtea, hilabetea, eguna): eta halako orduan:, honako hauek batera agertu gara, ezkondu gabeko bikote egonkorren udal erregistroaren arduradunaren aitzinean:

Izena:; jaioterria:; helbidea (eroldakoa):, adinez nagusia (edo adingabe burujabea, horren agiria aurkezten baitugu); N.A.N. zenbakia:

Izena:; sorteria:; helbidea (eroldakoa):, adinez nagusia (edo adingabe burujabea, horren agiria aurkezten baitugu); N.A.N. zenbakia:

Eta adierazten dugu:

"Ezkondu gabeko bikote egonkorren" Udal honetako erregistroan inskriba gaitzela nahi dugula, horri buruzko ordenantzaren arabera, eta horretarako

Aitortzen dugu:

Lehenbizi: urtetik eratzen dugula bizikidetasunezko elkartze bat, ezkontzarik gabea. Aipatu ordenantzan aurreikusitako bizikidetasuna dela eta, gure helbidea honako hau izanen dela: (oroitarazi behar zaio jaunari/andeari T.A.O.L.aren 15. artikuluari jarraikiz, erroldatu beharra duela ohiko bizilekuko udalerrian.)

Bigarren: Ez gaudela gu biok ezkontzaren bidez lotuak, ez eta gutako inor bertze inorekin ere.

Hirugarren: gure artean ez dagoela lerro zuzenean odolkidetasunezko edo adopzio bidezko ahaidetasunik, ez eta alboko lerrotik bigarren mailara bitarteko odolkidetasunezko ahaidetasunik ere.

Laugarren: gutako inork ez duela akats edo anomalia psikikorik, ez eta elkartzeko inolako ezgaitasunik ere.

Borzgarren: ez dugula nahi (nahi dugula) erregistroan jasotzerik gure arteko giza nahiz ondare mailako harremanen gaineko hitzarmenik.

Seigarren: baimena ematen dugula Etxauriko Udal Erroldan datu hauek egiaztatzeko.

Eta zin egiten dugu gutako inor ez dagoela inskribatua ez Etxauriko erregistroan, ez maila eta xede bereko inongo herritako erregistroan ere.

Horiek horrela,

Ezkondu gabeko bikote egonkorren Etxauriko Udal honen erregistroan inskriba gaitzela eskatzen dugu.

Eginbidea. Agerraldi honen bidez gauzatu egiten da jaunak/andreak eta jaunak/andreak eratzen duten elkartzearen inskripzioa.

Hori guztia jaso eta egiaztatzen dut, Etxaurin,(e)koaren(e)an.

Idazkaria

II. ERANSKINA

Etxauriko Udalean, egunean, honako hauek agertu gara:

Izena: N.A.N. zenbakia:, eta

Izena:; N.A.N. zenbakia:,

Eta Ezkondu gabeko bikote egonkorren Udalaren erregistroaren antolaketa eta funtzionamendua arautzen dituen ordenantzan zehaztutakoarekin bat, adierazten dugu asmoa dugula gure arteko bikote egonkorra bukatutzat edo iraungitzat jotzeko, izan ere horrelaxe inskribatua dago aipatu Udalaren erregistroan.

Horregatik guztiagatik, eskatzen dugu bukatutzat edo iraungitzat jo dadila aipatutako elkartearen inskripzioa, eta horretarako sinatu egiten dugu agerraldi honetan.

Eginbidea.-Jasota gera dadin, agerraldi honen bidez, jaunak/andreak eta jaun/andreak osaturiko elkartearen iraungitzeari buruz jaunak/andreak egin duen deklarazioa Liburu Nagusian, orrian, idazpenaren bazterrean idatzi dela.

Hori guztia jaso eta ziurtatzen dut, Etxaurin eta data honekin:

Idazkaria